

# 文殊师利所说摩诃 般若波罗蜜经

梁扶南三藏曼陀罗仙译



南無本師釋迦牟尼佛

## 说 明

本简体校正版《文殊师利所说摩诃般若波罗蜜经》电子书，根据《乾隆大藏经》大乘般若部，第 0018 部，梁扶南三藏曼陀罗仙译《文殊师利所说摩诃般若波罗蜜经》原藏影印本校正，句读仅供参考。

本电子书是免费结缘品。特此说明。

仁慧草堂

二〇一八年九月

## ● 起诵仪

### 香赞

(一遍)

炉香乍爇. 法界蒙薰. 诸佛海会悉遥闻. 随处结祥云. 诚意方殷. 诸佛现全身.

南無香云盖菩萨摩诃萨 (合掌三称)

南無本师释迦牟尼佛 (合掌三称)

### 开经偈

(一遍)

无上甚深微妙法 百千万劫难遭遇  
我今见闻得受持 愿解如来真实义

# 文殊师利所说摩诃般若波罗蜜经

梁扶南三藏曼陀罗仙译<sup>1</sup>

如是我闻：

一时，佛在舍卫国·祇树·给孤独园，与大比丘僧满足千人；菩萨摩诃萨十千人俱，以大庄严而自庄严，皆悉已住不退转地，其名曰弥勒菩萨、文殊师利菩萨、无碍辩菩萨、不舍担菩萨，与如是等大菩萨俱。文殊师利童真菩萨摩诃萨，明相现时，从其住处来诣佛所，在外而立。

尔时，尊者舍利弗、富楼那弥多罗尼子、大目乾<sup>2</sup>连、摩诃迦叶、摩诃迦旃延、摩诃拘絺罗，如是等诸大声闻，各从住处俱诣佛所，在外而立。

佛知众会皆悉集已。

尔时，如来从住处出，敷座而坐。告舍利弗：“汝今何故，于晨朝时，在门外立？”

舍利弗白佛言：“世尊！文殊师利童真菩萨先已至此，住门外立，我实于后晚来到耳。”

尔时，世尊问文殊师利：“汝实先来到此住

<sup>1</sup> 大正藏：梁扶南国三藏曼陀罗仙译

<sup>2</sup> 大正藏：捷

处，欲见如来耶？”

文殊师利即白佛言：“如是，世尊！我实来此欲见如来。何以故？我乐正观利益众生。我观如来如如相不异相、不动相不作相、无生相无灭相、不有相不无相、不在方不离方、非三世非不三世、非二相非不二相、非垢相非净相，以如是等正观如来利益众生。”

佛告文殊师利：“若能如是见于如来，心无所取亦无不取，非积聚非不积聚。”

尔时，舍利弗语文殊师利言：“若能如汝所说<sup>3</sup>见如来者，甚为希有。为一切众生故见于如来，而心不取众生之相；化一切众生向于涅槃，而亦不取向涅槃相；为一切众生发大庄严，而心不见庄严之相。”

尔时，文殊师利童真菩萨摩訶萨语舍利弗言：“如是！如是！如汝所说。虽为一切众生发大庄严心，恒不见有众生相；为一切众生发大庄严，而众生界<sup>4</sup>亦不增不减。假使一佛住世，若一劫若过一劫，如此一佛世界，复有无量无边恒河沙诸佛，如是一一佛，若一劫若过一劫，昼夜说法

<sup>3</sup> 大正藏：若能如是，如汝所说；永乐北藏及龙藏：若能如汝所说

<sup>4</sup> 大正藏：趣

心不<sup>5</sup>暂息，各各度于无量恒河沙众生皆入涅槃，而众生界亦不增不减，乃至十方诸佛世界亦复如是，一一诸佛说法教化，各度无量恒河沙众生皆入涅槃，于众生界亦不增不减。何以故？众生定相不可得故，是故众生界不增不减。”

舍利弗复语文殊师利言：“若众生界不增不减，何故菩萨为诸众生，求阿耨多罗三藐三菩提，常行说法？”

文殊师利白佛言<sup>6</sup>：“若诸众生悉空相者，亦无菩萨求阿耨多罗三藐三菩提，亦无众生而为说法。何以故？我说法中无有一法当可得故。”

尔时，佛告文殊师利：“若无众生，云何说有众生及众生界？”

文殊师利言：“众生界相，如诸佛界。”

又问：“众生界者是有量耶？”

答曰：“众生界量如佛界量。”

又问<sup>7</sup>：“众生界量有处所不？”

答曰：“众生界量不可思议。”

又问：“众生界相为有住不？”

答曰：“众生无住，犹如空住。”

<sup>5</sup> 大正藏：无

<sup>6</sup> 大正藏：文殊师利言；永乐北藏及龙藏：文殊师利白佛言

<sup>7</sup> 大正藏：佛又问；永乐北藏及龙藏：又问

佛告文殊师利：“如是修般若波罗蜜时，当云何住般若波罗蜜？”

文殊师利言：“以不住法为住般若波罗蜜。”

佛复问文殊师利言：“云何<sup>8</sup>不住法名住般若波罗蜜？”

文殊师利言：“以无住相，即住般若波罗蜜。”

佛复告文殊师利：“如是住般若波罗蜜时，是诸善根，云何增长？云何损减？”

文殊师利言：“若能如是住般若波罗蜜，于诸善根无增无减，于一切法亦无增无减，是般若波罗蜜性相亦无增无减。世尊！如是修般若波罗蜜则不舍凡夫法，亦不取贤圣法。何以故？般若波罗蜜不见有法可取可舍，如是修般若波罗蜜，亦不见涅槃可乐、生死可厌。何以故？不见生死，况复厌离？不见涅槃，何况乐著？如是修般若波罗蜜，不见垢恼可舍，亦不见功德可取，于一切法心不<sup>9</sup>增减。何以故？不见法界有增减故。世尊！若能如是，是名修般若波罗蜜。世尊！不见诸法有生有灭，是修般若波罗蜜。世尊！不见诸法有增有减，是修般若波罗蜜。世尊！心无希<sup>10</sup>取，

<sup>8</sup> 大正藏：云何；永乐北藏及龙藏：言云何

<sup>9</sup> 大正藏：无

<sup>10</sup> 大正藏：悌

不见法相有可求者，是修般若波罗蜜。世尊！不见好丑，不生高下，不作取舍。何以故？法无好丑，离诸相故；法无高下，等法性故；法无取舍，住实际故。是修般若波罗蜜。”

佛告文殊师利：“是诸佛法得不胜数乎？”

文殊师利言：“我不见诸法有胜如相。如来自觉一切法空，是可证知。”

佛告文殊师利：“如是！如是！如来正觉自证空法。”

文殊师利白佛言：“世尊！是空法中，当有胜如而可得耶？”

佛言：“善哉！善哉！文殊师利，如汝所说，是真法乎？”

佛复谓文殊师利言：“阿耨多罗是佛法不<sup>11</sup>？”

文殊师利言：“如佛所说，阿耨多罗是名佛法。何以故？无法可得名阿耨多罗。”

文殊师利言：“如是修般若波罗蜜，不名法器，非化凡夫法，亦非佛法、非增长法，是修般若波罗蜜。复次，世尊！修般若波罗蜜时，不见有法可分别思惟。”

佛告文殊师利：“汝于佛法不思惟耶？”

<sup>11</sup> 大正藏：是名佛法不；永乐北藏及龙藏：是佛法不

文殊师利言：“不也，世尊！如我思惟，不见佛法，亦不可分别是凡夫法、是声闻法、是辟支佛法，如是名为无上佛法。复次，修般若波罗蜜时，不见凡夫相、不见佛法相、不见诸法有决定相，是为修般若波罗蜜。复次，修般若波罗蜜时，不见欲界、不见色界、不见无色界、不见寂灭界。何以故？不见有法是灭尽相<sup>12</sup>，是修般若波罗蜜。复次，修般若波罗蜜时，不见作恩者、不见报恩者，思惟二相心无分别，是修般若波罗蜜。复次，修般若波罗蜜时，不见是佛法可取，不见是凡夫法可舍，是修般若波罗蜜。复次，修般若波罗蜜时，不见凡夫法可灭，亦不见佛法而心证知，是修般若波罗蜜。”

佛告文殊师利：“善哉！善哉！汝能如是善说甚深般若波罗蜜相，是诸菩萨摩诃萨所学法印，乃至声闻、缘觉、学、无学人，亦当不离是印而修道果。”

佛告文殊师利：“若人得闻是法，不惊不畏者，不从千佛所种诸善根，乃至百千万亿佛所久植德本，乃能于是甚深般若波罗蜜不惊不怖。”

文殊师利白佛言：“世尊！我今更说般若波

<sup>12</sup> 大正藏：尽灭相；永乐北藏及龙藏：灭尽相

罗蜜义。”

佛言：“便说。”

“世尊！修般若波罗蜜时，不见法是应住是不应住，亦不见境界可取舍相。何以故？如诸如来不见一切法境界相故，乃至不见诸佛境界，况取声闻、缘觉、凡夫境界。不取思议相亦不取不思议相，不见诸法有若干相，自证空法不可思议。如是菩萨摩訶萨，皆已供养无量百千万亿诸佛种诸善根，乃能于是甚深般若波罗蜜不惊不怖。复次，修般若波罗蜜时，不见缚不见解，而于凡夫乃至三乘不见差别相，是修般若波罗蜜。”

佛告文殊师利：“汝已供养几所诸佛？”

文殊师利言：“我及诸佛如幻化相，不见供养及与受者。”

佛告文殊师利：“汝今可不住佛乘耶？”

文殊师利言：“如我思惟，不见一法，云何当得住于佛乘？”

佛言：“文殊师利，汝不得佛乘乎？”

文殊师利言：“如佛乘者，但有名字，非可得亦不可见。我云何得？”

佛言：“文殊师利，汝得无碍智乎？”

文殊师利言：“我即无碍，云何以无碍而得

无碍<sup>13</sup>？”

佛言：“汝坐道场乎？”

文殊师利言：“一切如来不坐道场，我今云何独坐道场？何以故？现见诸法住实际故。”

佛言：“云何名实际？”

文殊师利言：“身见等是实际。”

佛言：“云何身见是实际？”

文殊师利言：“身见如相，非实非不实，不来不去，亦身非身，是名实际。”

舍利弗白佛言：“世尊！若于斯义谛了决定，是名菩萨摩訶萨。何以故？能<sup>14</sup>闻如是甚深般若波罗蜜相，心不惊不怖，不没不悔。”

弥勒菩萨白佛言：“世尊！得闻如是般若波罗蜜，具足法相，是即近于佛坐。何以故？如来现觉此法相故。”

文殊师利白佛言：“世尊！得闻甚深般若波罗蜜，能不惊不怖，不没不悔，当知此人即是见佛。”

尔时，复有无相优婆夷白佛言：“世尊！凡夫法、声闻法、辟支佛法、菩萨法<sup>15</sup>、佛法，是

<sup>13</sup> 大正藏：阙

<sup>14</sup> 大正藏：得

<sup>15</sup> “菩萨法”句，大正藏及丽藏无；永乐北藏及龙藏有。

诸法皆无相。是故于所从闻般若波罗蜜，皆不惊不怖，不没不悔。何以故？一切诸法本无相故。”

佛告舍利弗：“善男子、善女人，若闻如是甚深般若波罗蜜，心得决定，不惊不怖，不没不悔。当知是人，即住不退转地。若人闻是甚深般若波罗蜜，不惊不怖，不没不悔<sup>16</sup>，信乐听受，欢喜不厌。是即具足檀波罗蜜、尸罗波罗蜜<sup>17</sup>、羼提波罗蜜、毘梨耶波罗蜜、禅波罗蜜、般若波罗蜜，亦能为他显示分别，如说修行。”

佛告文殊师利：“汝观何义为得阿耨多罗三藐三菩提？住阿耨多罗三藐三菩提？”

文殊师利言：“我无得阿耨多罗三藐三菩提，我不住佛乘，云何当得阿耨多罗三藐三菩提？如我所说，即菩提相。”

佛赞文殊师利言：“善哉！善哉！汝能于是甚深法中巧说斯义。汝于先佛久种善根，以无相法净修梵行。”

文殊师利言：“若见有相则言无相，我今不见有相亦不见无相，云何而言以无相法净修梵行？”

<sup>16</sup> “不没不悔”句，大正藏及丽藏无；永乐北藏及龙藏有。

<sup>17</sup> 大正藏：尸波罗蜜；永乐北藏及龙藏：尸罗波罗蜜

佛告文殊师利：“汝见声闻戒耶？”

答曰：“见。”

佛言：“汝云何见？”

文殊师利言：“我不作凡夫见不作圣人见，不作学见不作无学见，不作大见不作小见，不作调伏见不作不调伏见，非见非不见。”

舍利弗语文殊师利言：“汝今如是观声闻乘，若观佛乘，当复云何？”

文殊师利言：“不见菩萨<sup>18</sup>法，不见修行菩提及证菩提者。”

舍利弗语文殊师利言：“云何名佛？云何观佛？”

文殊师利言：“云何为我？”

舍利弗言：“我者但有名字，名字相空。”

文殊师利言：“如是！如是！如我但有名字，佛亦但有名字。名字相空，即是菩提，不以名字而求菩提。菩提之相，无言无说。何以故？言说菩提，二俱空故。复次，舍利弗！汝问‘云何名佛？云何观佛？’者，不生不灭，不来不去，非名非相，是名为佛。如自观身实相，观佛亦然，唯有智者乃能知耳，是名观佛。”

<sup>18</sup> 大正藏：提

尔时，舍利弗白佛言：“世尊！如文殊师利所说般若波罗蜜，非初学菩萨所能了知。”

文殊师利言：“非但初学菩萨所不能知，及诸二乘所作已办者，亦未能了<sup>19</sup>。如是说法，无能知者。何以故？菩提之相，实无有法而可知故，不见无闻，无得无念，无生无灭，无说无听。如是菩提性相空寂，无证无知，无形无相，云何当有得菩提者。”

舍利弗语文殊师利言：“佛于法界，不证阿耨多罗三藐三菩提耶？”

文殊师利言：“不也，舍利弗！何以故？世尊即是法界。若以法界证法界者，即是诤论。舍利弗！法界之相即是菩提。何以故？是法界中无众生相，一切法空故。一切法空即是菩提，无二无分别故。舍利弗！无分别中则无知者，若无知者即无言说，无言说相即非有非无、非知非不知。一切诸法亦复如是。何以故？一切诸法不见处所，决定性故。如逆罪相不可思议。何以故？诸法实相不可坏故。如是逆罪亦无本性，不生天上不堕地狱，亦不入涅槃。何以故？一切业缘皆住实际，不来不去，非因非果。何以故？法界无边，无前

<sup>19</sup> 大正藏：亦未能了知；永乐北藏及龙藏：亦未能了

无后故。是故，舍利弗！若见犯重比丘不堕地狱，  
清净行者不入涅槃，如是比丘非应供非不应供，  
非尽漏非不尽漏。何以故？于诸法中住平等故。”

舍利弗言：“云何名不退法忍？”

文殊师利言：“不见少法有生灭相，名不退  
法忍。”

舍利弗言：“云何复名不调比丘？”

文殊师利言：“漏尽阿罗汉，是名不调。何  
以故？诸结已尽，更无所调，故名不调。若过心  
行，名为凡夫。何以故？凡夫众生不顺法界，是  
故名过。”

舍利弗言：“善哉！善哉！汝今为我善解漏  
尽阿罗汉义。”

文殊师利言：“如是！如是！我即漏尽真阿  
罗汉。何以故？断求声闻欲及辟支佛欲，以是因  
缘故，名漏尽得阿罗汉。”

佛告文殊师利：“诸菩萨等坐道场时，觉悟  
阿耨多罗三藐三菩提不？”

文殊师利言：“菩萨坐于道场，无有觉悟阿  
耨多罗三藐三菩提。何以故？如菩提相，无有少  
法而可得者，名阿耨多罗三藐三菩提。无相菩提，  
谁能坐者，亦无起者。以是因缘，不见菩萨坐于

道场，亦不觉证阿耨多罗三藐三菩提。”

文殊师利白佛言：“世尊！菩提即五逆，五逆即菩提。何以故？菩提五逆，无二相故。无觉无觉者<sup>20</sup>，不见不见者，无知无知者，无分别无分别者，如是之相名为菩提。见五逆相亦复如是。若言见有菩提而取证者，当知此辈即是增上慢人。”

尔时，世尊告文殊师利：“汝言我是如来。亦谓<sup>21</sup>我为如来乎？”

文殊师利言：“不也，世尊！我不谓如来为如来耶<sup>22</sup>？无有如相可名为如，亦无如来智能知于如。何以故？如来及智，无二相故。空为如来，但有名字，我当云何谓是如来？”

佛告文殊师利：“汝疑如来耶？”

文殊师利言：“不也，世尊！我观如来无决定性，无生无灭，故无所疑。”

佛告文殊师利：“汝今不谓如来出现于世耶？”

文殊师利言：“若有如来出现世者，一切法界亦应出现。”

<sup>20</sup> 大正藏：无学无学者；永乐北藏及龙藏：无觉无觉者

<sup>21</sup> 大正藏：谓；永乐北藏及龙藏：亦谓

<sup>22</sup> 大正藏：我谓不是如来为如来耶；永乐北藏及龙藏：我不谓如来为如来耶

佛告文殊师利：“汝谓恒沙诸佛入涅槃耶？”

文殊师利言：“诸佛一相，不可思议。”

佛语文殊师利：“如是！如是！佛是一相，不思议相。”

文殊师利白佛言：“世尊！佛今住世耶？”

佛语文殊师利：“如是！如是！”

文殊师利言：“若佛住世，恒沙诸佛亦应住世。何以故？一切诸佛皆同一相，不思议相。不思议相者<sup>23</sup>，无生无灭。若未来诸佛出兴于世，一切诸佛亦皆出世。何以故？不思议中，无过去未来现在相。但众生取著，谓有出世，谓佛灭度。”

佛告<sup>24</sup>文殊师利：“此是如来、阿罗汉、阿惟越致<sup>25</sup>菩萨所解。何以故？是三种人，闻甚深法，能不诽谤亦不赞叹。”

文殊师利白佛言：“世尊！如是不思议<sup>26</sup>，谁当诽谤？谁当赞叹？”

佛言：“文殊师利，如来<sup>27</sup>不思议，凡夫亦不思议。”

文殊师利白佛言：“世尊！凡夫亦不思议耶？”

<sup>23</sup> 大正藏：不思议相；永乐北藏及龙藏：不思议相者

<sup>24</sup> 大正藏：语

<sup>25</sup> 大正藏：阿鞞跋致；永乐北藏及龙藏：阿惟越致

<sup>26</sup> 大正藏：不思议法；永乐北藏及龙藏：不思议

<sup>27</sup> 大正藏：佛告文殊师利：“如来；永乐北藏及龙藏：佛言：“文殊师利，如来

佛言：“亦不思議。何以故？一切心相皆不思議。”

文殊师利言：“若如是说，如来不思議，凡夫亦不思議。今无数诸佛求于涅槃，徒自疲劳。何以故？不思議法即是涅槃，等无异故。”

文殊师利言：“如是凡夫不思議，诸佛不思議。若善男子、善女人，久习善根，近善知识，乃能了知。”

佛告文殊师利：“汝欲使如来于众生中为最胜耶？”

文殊师利言：“我欲使如来于诸众生为最第一，但众生相亦不可得。”

佛言：“汝欲使如来得不思議法耶？”

文殊师利言：“欲使如来得不思議法，而于诸法无成就者。”

佛告文殊师利：“欲使如来<sup>28</sup>说法教化耶？”

文殊师利白佛言：“欲使<sup>29</sup>如来说法教化，而是说及听者皆不可得。何以故？住法界故。法界、众生，无差别相。”

佛告文殊师利：“汝欲使如来为无上福田

<sup>28</sup> 大正藏：汝欲使如来；永乐北藏及龙藏：欲使如来

<sup>29</sup> 大正藏：我欲使；永乐北藏及龙藏：欲使

耶？”

文殊师利言：“如来是无尽福田，是无尽相，无尽相即无上福田。非福田非不福田，是名福田。无有明闇生灭等相，是名福田。若能如是解福田相，深植善种，亦无增无减<sup>30</sup>。”

佛告文殊师利：“云何植种，不增不减。”

文殊师利言：“福田之相，不可思议。若人于中如法修善，亦不可思议。如是植种，名无增无减，亦是无上最胜福田。”

尔时，大地以佛神力，六种震动，现无常相。一万六千人皆得无生法忍，七百比丘、三千优婆塞、四万优婆夷、六十亿那由他六欲诸天，远尘离垢，于诸法中得法眼净。

尔时，阿难从座而起，偏袒右肩，右膝著地，白佛言：“世尊！何因缘故，如是大地六种震动？”佛告阿难：“我说福田无差别相，故现斯瑞。往昔诸佛亦于此处，作如是说福田之相，利益众生，十方<sup>31</sup>世界六种震动。”

舍利弗白佛言：“世尊！文殊师利是不可思议。何以故？所说法相，不可思议。”

<sup>30</sup> 大正藏：亦无增减；永乐北藏及龙藏：亦无增无减

<sup>31</sup> 大正藏：一切；永乐北藏及龙藏：十方

佛告文殊师利：“如是！如是！如舍利弗言，汝之所说，实不思議<sup>32</sup>。”

文殊师利白佛言：“世尊！不思議<sup>33</sup>不可说，思议亦不可说。如是思议、不思議性俱不可说，一切声相，非可思议<sup>34</sup>亦非不可思议。”

佛言：“汝入不思議三昧耶？”

文殊师利言：“不也，世尊！我即不思議，不见有心能思议者。云何而言入不思議三昧？我初发心欲入是定，而今思惟，实无心相而入三昧。如人学射，久习则巧，后虽无心，以久习故，箭发皆中。我亦如是，初学不思議三昧，系心一缘，若久习成就，更无心想，恒与定俱。”

舍利弗语文殊师利言：“更有胜妙寂灭定不？”

文殊师利言：“若有不思議定者，汝可问言：‘更有寂灭定不？’如我意解，不可思议定尚不可得，云何问有寂灭定乎？”

舍利弗言：“不思議<sup>35</sup>定不可得耶？”

文殊师利言：“思议定者，是可得相；不可思议定者，不可得相。一切众生实成就不思议定。

<sup>32</sup> 大正藏：实不可思议；永乐北藏及龙藏：实不思議

<sup>33</sup> 大正藏：不可思议；永乐北藏及龙藏：不思議

<sup>34</sup> 大正藏：非思议；永乐北藏及龙藏：非可思议

<sup>35</sup> 大正藏：不可思议；永乐北藏及龙藏：不思議

何以故？一切心相即非心故，是名不思議定。是故一切众生相及不思議三昧相，等无分别。”

佛赞文殊师利言：“善哉！善哉！汝于诸佛久植<sup>36</sup>善根，净修梵行，乃能演说甚深三昧。汝今安住如是般若波罗蜜中。”

文殊师利言：“若我住般若波罗蜜中，能作是说，即是有想，便住我想。若住有想、我想中者，般若波罗蜜便有处所。般若波罗蜜若住于无，亦是我想，亦名处所。离此二处，住无所住，如诸佛住，安处寂灭非思議境界。如是不思議，名般若波罗蜜住处。般若波罗蜜处，一切法无相，一切法无作。般若波罗蜜即不思議，不思議即法界，法界即无相，无相即不思議，不思議即般若波罗蜜。般若波罗蜜、法界无二无别，无二无别即法界，法界即无相，无相即般若波罗蜜界。般若波罗蜜界即不思議界，不思議界即无生无灭界，无生无灭界即不思議界。”

文殊师利言：“如来界及我界，即不二相。如是修般若波罗蜜者则不求菩提。何以故？菩提相离，即<sup>37</sup>般若波罗蜜故。世尊！若知我相而不

<sup>36</sup> 大正藏：殖；永乐北藏及龙藏：植

<sup>37</sup> 大正藏：即是；永乐北藏及龙藏：即

可著，无知无著是佛所知。不可思议无知无著，即佛所知。何以故？知体本性无所有相。云何能转法界？若知本性无体无著者，即名无物。若无有物，是无处所，无依无住。无依无住即无生无灭，无生无灭即是有为无为功德。若如是知，则无心想。无心想者，云何当知有为无为功德？无知即不思议，不思议者是佛所知，亦无取无不取，不见三世去来等相，不取生灭及诸起作，亦不断不常。如是知者，是名正智、不思议智，如虚空，无此无彼，不可比类，无好恶，无等等，无相无貌。”

佛告文殊师利：“若如是知，名不退智。”

文殊师利言：“无作智名不退智，犹如金矿<sup>38</sup>，先加槌<sup>39</sup>打，方知好恶。若不槌<sup>40</sup>打，无能知者。不退智相亦复如是，要行境界，不念不著，无起无作，具足不动，不生不灭，尔乃显现。”

尔时，佛告文殊师利言：“如诸如来自说己智，谁当能信？”

文殊师利言：“如是智者，非涅槃法，非生死法，是寂灭行，是无动行，不断贪欲、瞋恚、

<sup>38</sup> 大正藏：铤；永乐北藏及龙藏：矿

<sup>39</sup> 大正藏：锤；永乐北藏及龙藏：槌

<sup>40</sup> 大正藏：治；永乐北藏及龙藏：槌

愚痴，亦非不断。何以故？无尽无灭，不离生死亦非不离，不修道非不修道，作是解者名为正信。”

佛告文殊师利言：“善哉！善哉！如汝所说，深解斯义。”

尔时，摩诃迦叶白佛言：“世尊！于当来世，若说如是甚深正法，谁能信解如闻受行？”

佛告迦叶：“今此会中比丘、比丘尼、优婆塞、优婆夷，得闻此经者，如是人等，于未来世若闻是法，必能信解于甚深般若波罗蜜，乃能读诵信解受持，亦为他人分别演说。譬如长者失摩尼宝，忧愁苦恼。后若还得，心甚欢喜。如是，迦叶！比丘、比丘尼、优婆塞、优婆夷等，亦复如是，有信乐心，若不闻法，则生苦恼；若得闻时，信解受持，常乐读诵，甚大欢喜。当知此人即是见佛，亦即亲近供养诸佛。”

佛告迦叶：“譬如忉利天上波利质多罗树疮初出时，是中诸天见是树已皆大欢喜，此树不久必当开敷。若比丘、比丘尼、优婆塞、优婆夷，得闻般若波罗蜜，能生信解，亦复如是，此人不久亦当开敷一切佛法。于当来世，有比丘、比丘尼、优婆塞、优婆夷，闻般若波罗蜜，信受读诵，心不悔没，当知是人已从此会听受是经，亦能为

人聚落城邑广说流布，当知是人佛所护念。如是甚深般若波罗蜜中，有能信乐无疑惑者，是善男子、善女人，于过去诸佛，久已修学，殖诸<sup>41</sup>善根。譬如有人以手穿珠，忽遇无上真摩尼宝，心大欢喜，当知是人必已曾见。

“如是，迦叶，若善男子、善女人，修学余法，忽然得闻甚深般若波罗蜜，能生欢喜，亦复如是。当知此人，已曾闻故。若有众生得闻甚深般若波罗蜜，心能信受，生大欢喜，如是人等，亦曾亲近无数诸佛，从闻般若波罗蜜，已修学故。譬如有人，先所经见城邑聚落，后若闻人赞叹彼城所有园苑、种种池泉、华果林树、男女人民皆可爱乐，是人闻已，即大欢喜，更劝令说是城园苑众好严饰，杂华池泉多诸甘果，种种珍妙一切爱乐。是人得闻，重甚欢喜。如是之人，皆曾见故。若善男子、善女人，有闻般若波罗蜜，信心听受，能生欢喜，乐闻不厌，而更劝说，当知此辈，已从文殊师利曾闻如是般若波罗蜜故。”

迦叶白佛言：“世尊！若将来世善男子、善女人，得闻是甚深般若波罗蜜，信乐听受。以是相故，当知此人，亦于过去佛所曾闻修学。”

<sup>41</sup> 大正藏：殖众；永乐北藏及龙藏：植诸

文殊师利白佛言：“世尊！佛说诸法，无作无相，第一寂灭。若善男子、善女人有能如是谛了斯义，如闻而<sup>42</sup>说，为诸如来之所赞叹。不违法相，是即佛说，亦是炽然般若波罗蜜相，亦名炽燃具足佛法，通达实相，不可思议。”

佛告文殊师利：“我本行菩萨道时，修诸善根，欲住阿惟越致<sup>43</sup>地，当学般若波罗蜜；欲成阿耨多罗三藐三菩提，当学般若波罗蜜。若善男子、善女人，欲解一切法相，欲知一切众生心界皆悉同等，当学般若波罗蜜。文殊师利，欲学一切佛法具足无碍，当学般若波罗蜜。欲学一切佛成阿耨多罗三藐三菩提时，相好威仪无量法式，当学般若波罗蜜。欲知一切佛不<sup>44</sup>成阿耨多罗三藐三菩提一切法式及诸威仪，当学般若波罗蜜。何以故？是空法中，不见诸佛菩提等故。若善男子、善女人，欲知如是等相无疑惑者，当学般若波罗蜜。何以故？般若波罗蜜不见诸法若生若灭、若垢若净。是故善男子、善女人，应作如是学般若波罗蜜。欲知一切法无过去、未来、现在等相，当学般若波罗蜜。何以故？法界性相无去、来、

<sup>42</sup> 大正藏：如；永乐北藏及龙藏：而

<sup>43</sup> 大正藏：阿鞞跋致；永乐北藏及龙藏：阿惟越致

<sup>44</sup> 大正藏：不；永乐北藏及龙藏：得

现在<sup>45</sup>故。欲知一切法同入法界心无罣碍，当学般若波罗蜜。欲得三转十二行法轮，亦自证知而不取著，当学般若波罗蜜。欲得慈心遍覆一切众生而无限齐，亦不作念有众生相，当学般若波罗蜜。欲得于一切众生不起诤论，亦复不取无诤论相，当学般若波罗蜜。欲知是处非处、十力、无畏，住佛智慧得无碍辩，当学般若波罗蜜。”

尔时，文殊师利白佛言：“世尊！我观正法，无为无相，无得无利，无生无灭，无来无去，无知者，不见者，无作者。不见般若波罗蜜，亦不见般若波罗蜜境界，非证非不证，不作戏论，无有分别。一切法无尽离尽，无凡夫法，无声闻法，无辟支佛法、佛法，非得非不得，不舍生死，不证涅槃，非思议非不思议，非作非不作，法相如是，不知云何当学般若波罗蜜？”

尔时，佛告文殊师利：“若能如是知诸法相，是名学<sup>46</sup>般若波罗蜜。菩萨摩訶萨若欲学菩提自在三昧，得是三昧已，照明一切甚深佛法及知一切诸佛名字，亦悉了达诸佛世界无有障碍，当如文殊师利所说般若波罗蜜中学。”

<sup>45</sup> 大正藏：三世；永乐北藏及龙藏：去、来、现在

<sup>46</sup> 大正藏：是名当学；永乐北藏及龙藏：是名学

文殊师利白佛言：“世尊！何故<sup>47</sup>名般若波罗蜜？”

佛言：“般若波罗蜜无边无际，无名无相，非思量，无归依，无洲渚，无犯无福，无晦无明，如法界<sup>48</sup>无有分齐亦无限数，是名般若波罗蜜，亦名菩萨摩訶萨行处。非行<sup>49</sup>非不行处，悉入一乘，名非行处，何以故？无念无作故。”

文殊师利白佛言：“世尊！当云何行能速得阿耨多罗三藐三菩提？”

佛言：“文殊师利，如般若波罗蜜所说行，能速得阿耨多罗三藐三菩提。复有一行三昧，若善男子、善女人修是三昧者，亦速得阿耨多罗三藐三菩提。”

文殊师利言：“世尊！云何名一行三昧？”

佛言：“法界一相，系缘法界，是名一行三昧。若善男子、善女人，欲入一行三昧，当先闻般若波罗蜜，如说修学，然后能入一行三昧。如法界缘，不退不坏，不思议，无碍无相。善男子、善女人，欲入一行三昧，应处空闲，舍诸乱意，不取相貌，系心一佛，专称名字，随佛方所，端

<sup>47</sup> 大正藏：何以故；永乐北藏及龙藏：何故

<sup>48</sup> 大正藏：犹如法界；永乐北藏及龙藏：如法界

<sup>49</sup> 大正藏：处；永乐北藏及龙藏：行

身正向，能于一佛念念相续，即是念中能见过去、未来、现在诸佛。何以故？念一佛功德无量无边，亦与无量诸佛功德、无二不思议佛法等无分别，皆乘一如，成最正觉，悉具无量功德、无量辩才。如是入一行三昧者，尽知恒沙诸佛法界无差别相。阿难所闻佛法，得念总持辩才智慧，于声闻中虽为最胜，犹住量数则有限碍。若得一行三昧，诸经法门一一分别，皆悉了知，决定无碍，昼夜常说，智慧辩才终不断绝。若比阿难多闻辩才，百千等分不及其一。菩萨摩訶萨应作是念：‘我当云何逮得一行三昧不可思议功德无量名称？’佛言：‘菩萨摩訶萨当念一行三昧，常勤精进而不懈怠。’如是次第渐渐修学，则能得入一行三昧，不可思议功德作证，除谤正法不信、恶业重罪障者所不能入。

“复次，文殊师利，譬如有人得摩尼珠，示其珠师。珠师答言：‘此是无价真摩尼宝。’即求师言：‘为我治磨，勿失光色。’珠师治已，随其磨时，珠色光明映彻表里。文殊师利，若有善男子、善女人，修学一行三昧不可思议功德无量名称，随修学时，知诸法相，明达无碍，功德增长，亦复如是。文殊师利，譬如日轮，光明遍满，无

有减相。若得一行三昧，悉能具足一切功德，无有缺少，亦复如是。照明佛法，如日轮光。

“文殊师利，我所说法，皆是一味离味、解脱味、寂灭味。若善男子、善女人得是一行三昧者，其所演说亦是一味离味、解脱味、寂灭味，随顺正法，无错谬相。文殊师利，若菩萨摩訶萨得是一行三昧，皆悉满足助道之法，速得阿耨多罗三藐三菩提。

“复次，文殊师利，菩萨摩訶萨不见法界有分别相及以一相，速得阿耨多罗三藐三菩提相，不可思议，是菩提中亦无得佛，如是知者，速得阿耨多罗三藐三菩提。若信一切法悉是佛法，不生惊怖亦不疑惑，如是忍者，速得阿耨多罗三藐三菩提。”

文殊师利白佛言：“世尊！以如是因，速得阿耨多罗三藐三菩提耶？”

佛言：“得阿耨多罗三藐三菩提，不以因得，不以非因得。何以故？不思議界，不以因得，不以非因得。若善男子、善女人闻如是说，不生懈怠，当知是人，以<sup>50</sup>于先佛种诸善根。是故，比丘、比丘尼闻说是甚深般若波罗蜜不生惊怖，即

<sup>50</sup> 大正藏：已；永乐北藏及龙藏：以

是从佛出家。若优婆塞、优婆夷，得闻如是甚深般若波罗蜜心不惊怖，即是成就真归依处。

“文殊师利，若善男子、善女人不习甚深般若波罗蜜，即是不修佛乘。譬如大地，一切药木皆依地生长，文殊师利，菩萨摩訶萨亦复如是，一切善根皆依般若波罗蜜而得增长，于阿耨多罗三藐三菩提不相违背。”

尔时，文殊师利白佛言：“世尊！此阎浮提城邑聚落，当于何处演说如是甚深般若波罗蜜？”

佛告文殊师利：“今此会中，若有人闻般若波罗蜜皆发誓言：‘于未来世，常得与般若波罗蜜相应。’从是信解，未来世中能听是经。当知此人，不从余小善根中来，所能堪受，闻已欢喜。文殊师利，若复有人，从汝听是般若波罗蜜，应作是言：‘此般若波罗蜜中，无声闻法<sup>51</sup>、辟支佛法、菩萨法、佛法<sup>52</sup>，亦无凡夫生灭等法。’”

文殊师利白佛言：“世尊！若比丘、比丘尼、优婆塞、优婆夷，来问我言：‘云何如来说般若波罗蜜？’我当答言：‘一切诸法无诤论相，云何如来当说般若波罗蜜？’何以故？不见有法可

<sup>51</sup> 大正藏：无声闻；永乐北藏及龙藏：无声闻法

<sup>52</sup> 大正藏：佛法；永乐北藏及龙藏：菩萨法、佛法

与法诤论<sup>53</sup>，亦无众生心识能知。复次，世尊！我当更说究竟实际。何以故？一切法相同入实际，阿罗汉无别胜法。何以故？阿罗汉法、凡夫法，不一不异故。复次，世尊！如是说法，无有众生已得涅槃、今得、当得。何以故？无有决定众生相故。”

文殊师利言：“若人欲闻般若波罗蜜，我当作如是说。其有听者，不念不著，无闻无得，当如幻人无所分别。如是说者，是真说法。是故听者莫作二相，不舍诸见而修佛法，不取佛法，不舍凡夫法。何以故？佛及凡夫，二法相空，无取舍故。若人问我，当作是说，如是安慰，如是建立。善男子、善女人应如是问，作如是住，心不退没<sup>54</sup>，当如法相随愿<sup>55</sup>般若波罗蜜说。”

尔时，世尊叹文殊师利言<sup>56</sup>：“善哉！善哉！如汝所说。若善男子、善女人欲见诸佛，应学如是般若波罗蜜。欲亲近诸佛，如法供养，应学如是般若波罗蜜。若欲言如来是我世尊，应学如是般若波罗蜜。若欲言<sup>57</sup>如来非我世尊，亦应学如

<sup>53</sup> 大正藏：可与法诤论；永乐北藏及龙藏：可与诤论

<sup>54</sup> 大正藏：心不退不没；永乐北藏及龙藏：心不退没

<sup>55</sup> 大正藏：顺；永乐北藏及龙藏：愿

<sup>56</sup> 大正藏：世尊叹文殊师利；永乐北藏及龙藏：世尊叹文殊师利言

<sup>57</sup> 大正藏：若言；永乐北藏及龙藏：若欲言

是般若波罗蜜。若欲成阿耨多罗三藐三菩提，应学如是般若波罗蜜。若欲不成阿耨多罗三藐三菩提，亦应学如是般若波罗蜜。若欲成就一切三昧，应学如是般若波罗蜜。若欲不成就一切三昧，亦应学如是般若波罗蜜。何以故？无作三昧无异相故，一切法无生无出故。若欲知一切法假名，应学如是般若波罗蜜。若欲知一切众生修菩提道，不求<sup>58</sup>菩提相，心不退没，应学如是般若波罗蜜。何以故？一切法皆菩提相故。若欲知一切众生行非行相，非行即菩提，菩提即法界，法界即实际，心不退没，应学如是般若波罗蜜。若欲知一切如来神通变化，无相无碍亦无方所，应学如是般若波罗蜜。”

佛告文殊师利：“若比丘、比丘尼、优婆塞、优婆夷，欲得不堕恶趣，当学般若波罗蜜一四句偈，受持读诵，为他解说，随顺实相。如是善男子、善女人，当知决定得阿耨多罗三藐三菩提，则住佛国。若闻如是般若波罗蜜，不惊不畏，心生信解，当知此辈，佛所印可，是佛所行大乘法印。若善男子、善女人学此法印，超过恶趣，不入声闻、辟支佛道，以超过故。”

<sup>58</sup> 大正藏：不求；永乐北藏及龙藏：不来；龙藏：本来

尔时，帝释三十三天以天妙华，优钵罗华、拘物头华、分陀利华、天曼陀罗华等，天梅檀香及余末香，种种金宝，作天伎乐，为供养般若波罗蜜并诸如来及文殊师利，以散其上。作是供养已，“愿我常闻般若波罗蜜法印。”释提桓因复作是愿：“愿阎浮提善男子、善女人，常使得闻是经决定佛法，皆令信解、受持、读诵、为人演说。一切诸天为作拥护。”

尔时，佛告释提桓因言：“憍尸迦，如是！如是！善男子、善女人当得决定诸佛菩提。”

文殊师利白佛言：“世尊！如是受持，善男子、善女人得大利益，功德无量。”

尔时，以佛神力，一切大地六反<sup>59</sup>震动。佛时微笑，放大光明，遍照三千大千世界。

文殊师利白佛言：“世尊！即是如来印般若波罗蜜相。”

佛言：“文殊师利，如是！如是！说般若波罗蜜已皆现此瑞，为印般若波罗蜜故，使人受持，令无赞毁。何以故？无相法印不可赞毁。我今以是法印，令诸天魔不能得便。”

佛说是已，尔时，诸大菩萨及四部众闻说般

<sup>59</sup> 大正藏：种；永乐北藏及龙藏：反

若波罗蜜，皆大欢喜，信受奉行<sup>60</sup>。

文殊师利所说摩诃般若波罗蜜经

---

<sup>60</sup> 大正藏：欢喜奉行；永乐北藏及龙藏：皆大欢喜，信受奉行

## ● 结诵仪

### 补阙真言

(三遍)

南無喝啰怛那. 哆罗夜耶. 佉啰佉啰. 俱住俱住. 摩啰摩啰. 虎啰. 吽. 贺贺. 苏怛拿. 吽. 泼抹拿. 娑婆诃.

南無佛 南無法 南無僧 (合掌三称)

南無一切如来、应、正等觉 (合掌三称)

南無本师释迦牟尼佛 (合掌三称)

南無文殊师利菩萨摩诃萨 (合掌三称)

### 礼佛发愿文

(一遍)

归命十方调御师 演扬清净微妙法

三乘四果解脱僧 愿赐慈悲哀摄受

但(某甲)自违真性, 枉入迷流。随生死以飘沉, 逐色声而贪染。十缠十使, 积成有漏之因; 六根六尘, 妄作无边之罪。迷沦苦海, 深溺邪途。

著我耽人，举枉措直。累生业障，一切愆尤。仰三宝以慈悲，沥一心而忏悔。

所愿能仁拯拔，善友提携。出烦恼之深源，到菩提之彼岸。此世福基命位，各愿昌隆；来生智种灵苗，同希增秀。生逢中国，长遇明师。正信出家，童真入道。六根通利，三业纯和。不染世缘，常修梵行。执持禁戒，尘业不侵。严护威仪，蝇飞无损。不逢八难，不缺四缘。般若智以现前，菩提心而不退。修习正法，了悟大乘。开六度之行门，越三祇之劫海。建法幢于处处，破疑网于重重。降伏众魔，绍隆三宝。承事十方诸佛，无有疲劳。修学一切法门，悉皆通达。广作福慧，普利尘沙。得六种之神通，圆一生之佛果。然后不舍法界，遍入尘劳。等观音之慈心，行普贤之愿海。他方此界，逐类随形。应现色身，演扬妙法。泥犁苦趣，饿鬼道中，或放大光明，或现诸神变，其有见我相，乃至闻我名，皆发菩提心，永出轮回苦。火镬冰河之地，变作香林；饮铜食铁之徒，化生净土。披毛戴角，负债含怨，尽罢辛酸，咸沾利乐。疾疫世而现为药草，救疗沉痾；饥馑时而化作稻粱，济诸贫馁。但有利益，无不兴崇。次期累世冤亲，现存眷属，出四生之

汨没，舍万劫之爱缠。等与含生，齐成佛道。虚空有尽，我愿无穷。情与无情，同圆种智。

## 回向偈

(一遍)

诵经功德殊胜行 无边胜福皆回向  
普愿沉溺诸有情 速往无量光佛刹  
十方三世一切佛 一切菩萨摩诃萨  
摩诃般若波罗蜜

## 回向偈

(一遍)

愿以此功德 庄严佛净土  
上报四重恩 下济三途苦  
若有见闻者 悉发菩提心  
尽此一报身 同生极乐国

## 三皈依

(一遍)

自皈依佛，当愿众生，体解大道，发无上心。  
自皈依法，当愿众生，深入经藏，智慧如海。  
自皈依僧，当愿众生，统理大众，一切无碍，和南圣众。

南无护法韦驮尊天菩萨



ཡིག་ཉི་ཤུ་རྩ་གསུམ་པ་འདི་དཔེ་ཆ་འཛིན་པ་དང་བཞག་ན་དཔེ་ཆ་དེ་ཅི་འདྲར་  
བཀོམས་ཀྱང་ཉེས་པ་མི་འབྱུང་བར་འཇམ་དཔལ་ཚ་རྒྱུད་ལས་གསུངས་སོ།།

此咒置经书中可灭误跨之罪